

Sceptraque promittit, sacri Imperijque tiaram.
 Thau. At nobis nondum est cōspecta Colonia. Pan. cernes,
 Huc paulum deflecte oculos: celeberrima longè
 Hæc, Agrippinæ ducens de nomine nomen,
 Est: hanc felicem dicunt, meritoque beatam
 Dicier illa potest, si vel respexeris alta
 Mœnia, si turres, excellentesque domorum
 Structuras, cælo surgentia tecta Deorum,
 Reliquias Diuum, quibus est dotata: bicornis
 Si vel dona sinu Rhenus pater ampla patenti
 Quæ fundit, opere aut feruentia strata viarum.
 Hæc sint magna licet: tamen est felicior illo
 Nomine, quod tam felici Respublica ductu
 Tanta eat, & placida populus quod pace fruatur
 Felix, ante alias felix Vrbs: scilicet, istis
 Temporibus duris, quod semina dira malorum
 Innumerabilium, quod mille incommoda rerum,
 Deplorandarum sat nunquam, haud senserit: ipsa
 Liuida Fortune quod non experta furentis
 Tela: nec, ut plures alie, quas seua fatigans
 Exercet Nemesis, duos est passa labores:
 Consilij moderata pijs, virtute suprema,
 Arte Salentini, suprema Antistitis, alti
 Illius Herois, claro de sanguine creti
 Fsenburgorum Comitum: Groppere salubri
 Consilio qui primus ades: te docta Minerua
 Erudit, tibi sacrosancta volumina Legum
 Nosse dedit, Sophiæ & iucundos ire per hortos.
 Hæc eadem, auspicijs magni moderata Senatus,
 Alma viget: cuius pars est non infima, multo
 Eximius splendore vigil Liskirchius, æquis
 Legibus is populum & iustis consultus habenis
 Iustitia regit, & prudens nunc temperat urbem
 Consul: is & Musas mirè complexus & arteis,
 Et fouet, & colit ingenuas: queis dulcia cordi
 Carmina, laurigero qui Phæbo digna locuti,
 Hos generosus alit, diuino & nectare pascit.
 Nec minus has decies olim molitus habenas
 Est Sudermannus magna cum laude, probatam
 Et pietate grauis, canaque ætate verendus,
 Præclarus genitor tuus, o Henrice, repostam
 Cui licet indogredi docti penetralia Phæbi,
 Magnarumque graues rerum cognoscere causas
 Cui datur, Hansiacis & qui bene consulit acri
 Urbibus ingenio, dum res sub pectore versat
 Syndicus ambiguas, facundoque explicat ore.
 Nunc verò hinc alias ut concedamus ad vrbes
 Præcipuas quasdam, tu lumine percipe porro